



Broj: 03/1-50-14-7-36/17

Sarajevo, 6.7.2017.

PREDMET: Informacija o sastanku članova Zajedničke komisije za odbranu i sigurnost BiH sa gosp. Jukom Amanom, generalnim direktorom Međunarodne agencije za atomsku energiju, 23.5.2017.

Članovi Zajedničke komisije za odbranu i sigurnost BiH su se 23.5.2017. sastali u Sarajevu s Jukom Amanom, generalnim direktorom Međunarodne agencije za atomsku energiju sa sjedištem u Beču.

Sastanku su prisustvovali: Borislav Bojić, zamjenik predsjedavajućeg, Šemsudin Mehmedović i Hanka Vajzović, članovi Zajedničke komisije.

U pratnji gospodina Amana bili su Emir Dizdarević, direktor Državne regulatorne agencije za nuklearnu sigurnost, i Sanjin Halimović, ambasador Bosne i Hercegovine pri Stalnoj misiji BiH pri OSCE i UN u Beču.

Ova posjeta je i posebna čast i priznanje članovima Zajedničke komisije za odbranu i sigurnost BiH za njihov rad u parlamentarnom nadzoru sektora odbrane i sigurnosti, a posebno za partnerski i izuzetno koristan i sadržajan rad s Državnom regulatornom agencijom za nuklearnu sigurnost.

Na sastanku je konstatirano da smo mi zemlja bez nuklearnih postrojenja i da imamo vrlo male količine nuklearnih materijala i radioaktivnih izvora te da se naše osnovne aktivnosti, kada je u pitanju radijacija, svode na korištenje izvora zračenja pretežno u medicini i nešto manje u industriji.

Doprinos Bosne i Hercegovine globalnoj nuklearnoj sigurnosti je više nego skroman. Međutim, Agencija na čijem je čelu gosp. Amano ne razdvaja svoje članice na one koje više ili manje koriste nuklearnu energiju te ih jednako poštuje.

Članovi Zajedničke komisije upoznali su gosp. Amana i njegove saradnike s aktivnostima Zajedničke komisije i oba doma Parlamentarne skupštine BiH u vezi s Trgovskom gorom – potencijalnim skladištem nuklearnog otpada u Republici Hrvatskoj, koje je na samoj granici Bosne i Hercegovine. U vezi s Trgovskom gorom poznat je stav Bosne i Hercegovine, koji je izražen donošenjem nekoliko akata u formi deklaracija i rezolucija na raznim nivoima vlasti u BiH kojima se izražava zabrinutost postupcima Republike Hrvatske kada je u pitanju plan za odlaganje nuklearnog otpada u blizini granice s BiH.

Određeni broj članova Zajedničke komisije uključen je u rad šireg radnog tijela koje je formiralo Vijeće ministara BiH, a koje čine predstavnici iz svih nadležnih institucija sa zadatkom da provodi aktivnosti koje se odnose na praćenje koraka koje preduzima Republika Hrvatska po ovom pitanju i blagovremeno na njih odgovara.

Gosp. Juko Amano izrazio je zadovoljstvo susretom s članovima Zajedničke komisije. Istakao je značaj aktivnosti institucija BiH u zaštiti okoline, brojnih projekata koje Agencija realizira u BiH, posebno projekata značajnih za medicinu te rad određenih agencija u kojem su prioriteti jačanje i izgradnja sigurnog okruženja za građane.

Pozvao je članove Zajedničke komisije i Parlamentarne skupštine BiH da se i u narednom periodu uključe u procese koji, pored izrade propisa, koji su u skladu sa standardima UN-a i Evropske unije, treba da podrže institucije i agencije koje daju svoj neposredni doprinos stvaranju sigurnog okruženja i postizanju standarda koje će i ubuduće uvrštavati institucije BiH u procese potpuno kredibilnih partnera Međunarodne agencije za atomsku energiju.

Predsjedavajući Zajedničke komisije
Sifet Podžić